

Uunga siunnersuut: Akileraaruserinermik ingerlatsineq pillugu Inatsisartut inatsisaata allanngartinneqarneranik Inatsisartut inatsisissaat nr. xx, xx. xx 2016-imeersoq. (Nammineerluni nalunaarsuinissamut piffissarititaasumik, kiisalu nunani allani akileraartarnermi oqartussaasunut paasissutissanik tunniussisarnerit pillugit ilisimatitsisussaataitaneq, taamatullu aningaaserivimmi kontumik tunniussisussaataitaneq aammalu soraarnerussutisianut tunngasunik paasissutissanik nalunaarsuineq pillugit allanngueq)

Aningaasaqarnermut Akileraartarnermullu Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappasaaneerpeqarneranut

ISUMALIUTISSIISUTAA

Ulloq 31. oktober 2016-imi inissitsiternerup kingorna ataatsimiititaliap ilaasortarai:

Inatsisartunut ilaasortaq Jens Immanuelson, Siumut, siulittaasoq
Inatsisartunut ilaasortaq Randi V. Evaldsen, Demokraatit, siulittaasup tullia
Inatsisartunut ilaasortaq Nikolaj Jeremiassen, Siumut
Inatsisartunut ilaasortaq Jess Svane, Siumut
Inatsisartunut ilaasortaq Ane Hansen, Inuit Ataqatigiit
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Bendt B. Kristiansen, Inuit Ataqatigiit

UKA2016-imi siullermeerineq 27. september 2016-imi ingerlanneqarpoq, tamatumalu kingorna siunnersuut ataatsimiititaliamit misissorneqarluni.

Siunnersuutip imarisaa siunertaalu

Ilaatigut aningaasarsianit akileraarutit pillugit nutaamik inatsisiliornerup (UPA2016/21) ilaatigullu assersuutigalugu namminersortut inuussutissarsiummillu ingerlataqartut nammineerluni immersugassamik tunniussinissamut assigiinngitsunik killeqartinneqarnissaannik inuussutissarsiornermik ingerlataqartut kissaateqarnerisigut pissutsinik allanik arlalitsigut naleqqusaanerup kingunerisaanik akileraaruserinermik ingerlatsineq pillugu inatsimmi allannguitinik naleqqusaanernillu arlalinnik inatsisissatut siunnersuut imaqqarpoq. Inatsisissatut siunnersuutip imarisai pingaarnerit tassaapput:

- Akileraarutigut akiliissutaavallaarsimasut checkinngorlugit tunniunneqartarunnaar-nissaat, taamaattumillu innuttaasut aningaaserivimmi kontominnut innersuussisar-nissaat pisariaqassalluni.
- Namminersorlutik inuussutissarsiutilinnut, ingerlatseqatigiiffinnut aammalu aningaa-saateqarfinnut il.il. nammineeirluni immersukkamik qarasaasiakkut nassiussisartunut nammineeirluni immersukkanik tunniussivissat nutaat kingusinnerusut atuutilersin-neqarnissaat.
- Sulisorisatik sinnerlugit nunani allani soraarnerussutisiassanik ingerlatsivinni soraar-nerussutisiassanut aqqissuussinernut akiliutiminnik nalunaaruteqartarnissamut sulisit-sisut peqquneqarnissaat.
- Paasissutissat pillugit isumannaallisaanermi ajutoortoqartillugu inuit pineqartut paasis-sutissinneqarnissaannik aningaasaqarnikkut ingerlatsiviit akileraaruserinermillu inger-latsiviit peqquneqarnerisigut paasissutissat pillugit isumannaallisaaneq patajaallisar-neqassaaq.
- Tamatuma saniatigut Kommuneqarfik Sermersuup KANUKOKA-mit aninerata kingu-nerisaanik akileraaruserinermik ingerlatsineq pillugu inatsimmi iluarsissutissanik annikinnernik inatsisissatut siunnersuut imaqarpoq.

Siunnersuutip Inatsisartuni siullermeerneqarnera

Siunnersuut siullermeerneqarami nalinginnaasumik taparserneqarpoq, tamatumani malugi-niarneqarluni ilaatigut inatsisinik allanik akuersissuteqarsimaneq, teknologikkut nalinginnaa-sumik ineriartorneq kiisalu Kommuneqarfik Sermersuup KANUKOKA-mit aninera siunner-suuteqarnermut pissutaasut. Inatsisissatut siunnersuut tusarniutigineqarsimasoq aammalu inat-sisissatut siunnersuut tusarniaanermi akissutitut tiguneqartunut annertuutigut Naalakker-suisunit naleqqussarneqarsimasoq oqaatigineqarpoq. Taamaaliornikkulli allaffissorneruler-nermik pilersitsinissaq, tassungalu ilanngullugu inuussutissarsiutinik ingerlataqartut paasis-sutissanik nalunaaruteqarnissamut pisussaaffeqalernissaat aammalu paasissutissat pillugit inatsimmik unioqqutitsisoqarsimappat inunnut pineqartunut nalunaaruteqartussaataaneq isu-makuluutigineqarput.

Ataatsimiititaliap siunnersuummik suliarinninnera

Nalunaarsuiffimmut nalunaartussaannermt tunngatillugu soraarnerussutisiaqarnissamut akiliu-tinut atatillugu pisussaaffiliinissaq ataatsimiititaliamit maluginiarneqarpoq, soorlu tamanna siullermeerinninnermi aammalu inuussutissarsiutinik ingerlataqartut tusarniaanermut akissu-taanni aamma oqaatigineqartoq. Aammattaaq ataatsimiititaliamit maluginiarneqarpoq nalu-

naarsuiffiup siunertarigaa soraarnerussutisiassanut akiliuteqartut soraarnerussutisiassaminnik kingusinnerusukkut tigusinissaminni marloriaammik akileraannginnissaat qulakkeerniarlugu soraarnerussutisiassanut akileraarsimanerup siunissami uppernarsarsinnaanissaa. Tassunga atatillugu nalunaaruteqartussaataitaanerup siusinnerusukkut atuutileraneramik Naalakkersuisut oqarnerat ataatsimiititaliamit isumaqatigineqarpoq, tamannalu oqaluuserisassamut 21-mut (UPA2016) soraarnerussutisiassat akileraarutigineqartarnerannut tunngasumut atatillugu pivog inatsisissatut siunnersuummi matumani pinnani. Ataatsimiititaliap ilisimatinneqarnera malillugu nalunaarsuiffimmut nalunaarsuisussaataalernissaq immikkoortup 21-p oqaluuserineqarnerani annertunerusumik nassuiaatigineqanngilaq.

Ataatsimiititaliaq isumaqarpoq nalunaarsuiffiup allaffissornikkut kingunerisassai soraarnerussutisiassat akileraaruserneqartarnerat (UPA2016/21) pillugu taamani siunnersuutip suliarineqarneranut nalunaarsuiffiullu pilersinneqarnissaata aalajangerneqarneranut atatillugu itinerusunik saqqummiunneqarsimasariaqaraluartut. Paasissutissat taakku taamani inatsisissatut siunnersuutip suliarineqarneranut pingaaruteqarput aalajangiisuunatilli. Nalunaarsuiffik atuutissaguni paasissutissanik tassunga soorunami nalunaaruteqartoqartariaqartoq ataatsimiititaliamit tunngavissaatinneqarpoq. Aammattaaq nalunaarsuiffiup siunertarisaa kiisalu soraarnerussutisiassanut akiliutinit Kalaallit Nunaanni akileraaruteqarsimaneq pillugu nunanut allanut kingusinnerusukkut uppernarsaateqarsinnaaneq eqqarsaatigalugu soraarnerussutisiassanut akiliuteqarsimasut isiginiarneqarnerat ataatsimiititaliamit pingaartinneqarpoq.

Nalunaartussaataitaaneq nalunaaruteqartussaataitaanerup siuliani taaneqartup kinguneraa inunnullu paasissutissat pillugit inatsimmi nalunaarsorneqartut pisinnaatitaaffii pillugit § 28 aamma 29 malillugit. Taanna "Inunnik paasissutissanik suliarinnittarneq pillugu inatsisip Kalaallit Nunaanni atuutilersinneqarnera pillugu peqqussut" aqutigalugu 1. december 2016-imi atuutilissaaq. Tassunga atatillugu ataatsimiititaliamit maluginiarneqarpoq nalunaartussaataitaaneq (paasissutissiisussaataitaaneq) nalunaarsuiffimmut pineqartumut atatillugu kisimi atuunnani aammali inuit pillugit paasissutissanik suliarinninnermut nalinginnaasumik atuutissasoq. Taamaattumik inuussutissarsiummik ingerlatsisut inunnut paasissutissat pillugit inatsit malikumallugu qarasaasiakkut periutsinik siumoortumik pilersitsereernissaat naatsorsuutigineqartariaqarpoq, taamaattumillu tassunga atatillugu nalunaarsuiffimmut pineqartumut aningaasartuutaanerusussat annertusussangatinneqanngillat.

Siunnersuutip aningaasaqarnikkut kingunerisassai

Naalakkersuisut paasissutissiissutigaat pisortanut aningaasaqarnikkut allaffissornikkut kingunerisassat tassaassasut akileraaruserinermik ingerlatsiviup allaffissornikkut suliaasa annikinnerusumik annertusinerat, tassa tunniussivissat nikingasut atuutsinneqalerpata namminersorlutik inuussutissarsiutillit, ingerlatseqatigiiffiit peqatigiiffiillu amerlasuut pillugit naligiis-saarinermik suliat piffissaq ullumikkornit sivikinnerusoq atorlugu ingerlanneqartassammata.

IT-mik atortunik naleqqusnaanernut kiisalu soraarnerussutisiat pillugit paasissutissanik nalunaarsuineri atortunik ineriartortitsinissamut aningaasartuutissat ataasiartumik aningaasartuutaasussat 2 aamma 3 mio. kr.-it akornannik amerlassuseqassagunarput. Taakku saniatigut suliassaqarnerulerneq ukioq naallugu suliffiit marluk missinginik naleqassangatinneqarpoq, taakunanga aappaa ilinniagartuujussalluni. Akissarsianut ingerlatsinermullu ukiumut aningaasartuutissat 1,3 -t 1,5 mio. kr.-illu akornanniissangatinneqarput.

Akiliutitut checkimik tunniussisarnerup atorunnaariartornera, taamaasillunilu akileraarutavallaartunik il.il. kontomut nuussinikkut akiliisarnerit atornerarnerujartornerat pisortanut sipaaruteqaataassasoq naatsorsuutigineqarpoq.

Inuusutissarsiuutinik ingerlataqartut aningaasaqarnikkut allaffissornikkullu atugarisaat nammineerluni nalunaarsuinissamut piffissaliussamik allannguinerup kingunerisaanik pitsaanerulissangatinneqarput, tassami naatsorsuuseriviit, kukkunerisuiusut il.il. suliassatik piffissamut sivilisinerusumut agguataarsinnaalissammatic. Nammineerluni nalunaarsuinissamut piffissaliussap kingusinneruneratigut elektroniskimik atortorissaarutit atorlugit nalunaaruteqarnissamik piunasaqaat piffissami ikaarsaariarfiusumi inuusutissarsiuutinik ingerlataqartut aningaasartuuteqarnerulaalernerannik kinguneqarsinnaavoq. Tamatumali taamaallaat piffissami ikaarsaariarfiusumi pinissaa naatsorsuutigineqarpoq, tassa suliffeqarfiit elektroniskimik atortorissaarutit atorlugit nalunaaruteqarsinnaanermik iluaqutiginnilernissaq anguniarlugu suliffeqarfiit naatsorsuuserineri suleriaatsiminnik il.il. naleqqussaanerisa naammassinissaata tungaanut.


Soraarnerussutisiaqarnissamut imaluunniit inuunermut sillimmasiinerimik aaqqissuussinernut akiliutit pillugit nalunaaruteqartussaataaenimik allannguinerit inuusutissarsiuutinik ingerlataqartunut aningaasatigut allaffissornikkulluunniit sunniuteqangaarnaviangillat.

Allannguut aningaasaqarnikkut ingerlatsivinnut, sullitaminnik ilisimatitsisussanut aningaasatigut allaffissornikkullu sunniuteqassangatinneqarpoq.

Siunnersuutip aningaasaqarnikkut kingunerisassai pillugit Aningaasaqarnermut Akileraartarnermullu Ataatsimiititaliaq allanik ilassutissaqanngilaq.

Siunnersuut akuerineqassasoq ataatsimiititaliamit isumaqatigiittumik inassutigineqarpoq

Taama oqaaseqarluni isumaliutissiisummillu oqaatigineqartutut paasinnilluni ataatsimiititaliap siunnersuut aappasaaniigassanngortippaa.




Jens Immanuel, Siulittaasoq


Randi V. Evaldsen




Peter Olsen




Nikolaj Jeremiassen



Jess Svane



Ane Hansen



Bendt B. Kristiansen